



**CONCELLO DE OURENSE**  
**SECRETARIA XERAL DO PLENO**

**RESUMO DOS ACORDOS DO PLENO DO CONCELLO DO DÍA 3 DE  
SETEMBRO DO ANO 2021**

**1.- Aprobación da acta do Pleno Ordinario do 2 de xullo de 2021**

Posta a aprobación da acta do Pleno da sesión ordinaria do día 2 de xullo de 2021, apróbase por asentimento unánime.

**2.- Posta en coñecemento das resolucións ditadas dende a data de celebración do último Pleno e, en especial, dos seguintes:**

- Decreto núm. 6011, do 4/08/2021, sobre delegación temporal da Alcaldía no tenente de alcalde, don Armando Ojea Bouzo, o día 5 de agosto de 2021.
- Decreto núm. 6066, do 10/08/2021, sobre delegación temporal das funcións da Área de Servizos Sociais, que están atribuídas á concelleira dona Eugenia Díaz Abella, na concelleira dona Ana María Fernández Morenza dende o día 9 ao 13 de agosto de 2021, ambos os dous incluídos, e na concelleira dona Flora Moure Iglesias dende o día 17 ao 25 de agosto, ambos os dous incluídos.
- Decreto núm. 6120, do 10/08/2021, sobre delegación temporal das funcións da Área de Medio Ambiente, que están atribuídas ao concelleiro don Jorge Pumar Tesouro, na concelleira dona Ana María Fernández Morenza dende o día 14 ao 22 de agosto de 2021, ambos os dous incluídos.

O Concello Pleno deuse por informado dos decretos e resolucións da Alcaldía ditados dende a data de celebración do último Pleno.

**3.- Posta en coñecemento do decreto da Alcaldía-Presidencia sobre o nomeamento de representantes dos cidadáns nas xuntas de área (III)**

**“DECRETO DA ALCALDÍA-PRESIDENCIA SOBRE O NOMEAMENTO DE REPRESENTANTES DOS CIDADÁNS NAS XUNTAS DE ÁREA (III).**- Ourense, na data de sinatura electrónica.

O artigo 123.1.c) da Lei 7/1985, de 2 de abril, reguladora das bases do Réxime Local, dentro do seu Título X introducido polo apartado 4 do artigo primeiro da Lei 57/2003, de 16 de decembro; establece que lle corresponde ao Pleno, entre outras a seguinte atribución: *“A determinación dos niveis esenciais da organización municipal, entendendo por tales as grandes áreas de goberno [...], sen prexuízo das atribucións do Alcalde para determinar o número de cada un de tales órganos e establecer niveis complementarios inferiores.”*

O Regulamento Orgánico de Goberno e Organización do Pleno e a Comisión Especial de Suxestións e Reclamacións do Concello de Ourense, aprobado polo Pleno da Corporación do

Concello de Ourense, fiel ao mandato legal recollido no artigo 123, dispón no seu artigo 118.1 que *“Os servizos administrativos do Concello estrutúranse en áreas, que se determinarán tendo en conta os grandes contidos da actividade administrativa municipal de acordo co previsto no artigo 123.1 da Lei 7/1985.”*

O apartado 2 do mencionado artigo 118 atribúelle ao Alcalde o establecemento da organización e estrutura da administración municipal executiva, sen prexuízo das competencias atribuídas ao Pleno en materia de organización municipal. Asemade, correspondelle precisar o contido competencial de cada unha, así como no seu caso refundir e detallar.

O artigo 121.1 do referido Regulamento Orgánico, establece que *“Dentro de cada Área, e referido a materias que non sexan exclusivas do Pleno, o Alcalde ou concelleiro en quen delegue poderá convocar reunións con carácter periódico, que se denominarán “Xuntas de Área”, das que formarán parte todos os grupos políticos de acordo coa súa representación proporcional no Concello, e que terán por obxecto dar conta do funcionamento ordinario da área. Durante cada sesión o concelleiro secretario da Xunta de Goberno Local, ou funcionario en quen delegue, tomará as notas necesarias para redactar a acta na que se consignará:*

- a) Lugar da reunión, con expresión do local onde se celebre.*
- b) Día, mes, ano e hora en que comeza.*
- c) Nome e apelidos do presidente e dos concelleiros presentes.*
- d) Cando concorra, nome e apelidos dos funcionarios que foran chamados para comparecer ou asistir.*
- e) Asuntos que se examinan.*
- f) Opinións sintetizadas dos concelleiros.*
- g) Incidentes que se produzan e sezan dignos de sinalarse.*
- h) Hora en que se levanta a sesión.”*

O artigo 8 do Regulamento orgánico de participación cidadá do Excmo. Concello de Ourense, aprobado polo Pleno do Concello o 07.07.2006 e publicado no BOP de Ourense núm. 153 do 04.07.2007, establece o seguinte:

*“As Xuntas de Área do Concello poderá asistir con voz un representante dos cidadáns para se informar dos asuntos de interese xeral e do seu ámbito de actuación. Será nomeado polo alcalde a proposta da federación de veciños polo período dun ano ou tempo que se estableza na proposta.”*

Visto o informe xurídico emitido polo Xefe da Asesoría Xurídica de data 14.06.2019 sobre a interpretación do artigo 8 do Regulamento orgánico de participación cidadá e no que conclúe a posibilidade de que as dúas federacións de asociacións de veciños existentes na actualidade en Ourense poidan participar nas Xuntas de área, séndolles aplicable ó réxime de obriga de reserva e sixilo previsto no artigo 16.3 do Real decreto 2568/1986, do 28 de novembro, polo que se aproba o Regulamento de organización, funcionamento e réxime xurídico das Entidades Locais (ROF)

Visto o decreto núm. 2021005934 do 29.07.2021 polo que se regula a determinación, composición e funcionamento das Xuntas de área e se revoga o decreto núm. 2021004089 do 20.05.2021.

Visto o escrito con rexistro de entrada WEB2021010901 do 29.07.2021 asinado electronicamente por don Manuel Mosquera Rodríguez en nome e representación e en calidade de presidente da Federación de AA.VV de Ourense “Limiar”, con CIF núm. G32226276, no que propón o nomeamento dos representantes da dita entidade para cada unha das xuntas de área do Concello.

Visto o escrito con rexistro de entrada WEB2021011857 do 20.08.2021 asinado electronicamente por dona Lorinda Fernández Faria en nome e representación e en calidade de presidenta da Agrupación Miño de Asociacións Veciñais do Rural e a Periferia de Ourense, con CIF núm. G32408023, no que propón o nomeamento dos representantes da dita entidade para cada unha das xuntas de área do Concello.

De conformidade co exposto, e ao abeiro do disposto no artigo 124.4 b) e k) da Lei 7/1985, de 2 de abril, reguladora das Bases do Réxime Local, en relación cos artigos 118 a 121 do Regulamento Orgánico de Goberno e Organización do Pleno e a Comisión Especial de Suxestións e



## CONCELLO DE OURENSE SECRETARIA XERAL

Reclamacións do Concello de Ourense; e 8 do Regulamento orgánico de participación cidadá do Excmo. Concello de Ourense, **RESOLVO:**

**Primeiro.-** Nomear, de conformidade coa proposta efectuada pola Federación de AA.VV de Ourense “Limiar” mediante un escrito con rexistro de entrada WEB2021010901 do 29.07.2021, os representantes dos cidadáns da dita entidade en cada unha das Xuntas de Área do Concello que se indican. O nomeamento farase polo período de dous anos. Antes de que finalice o dito período, a entidade deberá presentar unha nova proposta de nomeamento. Calquera cambio que se produza nos representantes antes da finalización do período de nomeamento deberase comunicar ó Concello.

### **URBANISMO E INFRAESTRUTURAS, EDUCACIÓN, PROMOCIÓN ECONÓMICA, CULTURA, CONTRATACIÓN E PERSOAL**

Representante:

- Manuel Mosquera Rodríguez.

Suplentes:

- José Luis Lorenzo Blanco
- Senén Rodríguez Vázquez
- Rafael Camilo García Losada

### **PARTICIPACIÓN CIDADÁ, TURISMO E TERMALISMO**

Representante:

- Manuel Mosquera Rodríguez.

Suplentes:

- Patricia Helvira Santamaría Hervella
- Milagros Fernández Fernández
- José Antonio Andrade Castro

### **COMERCIO, SERVIZOS XERAIS E SEGURIDADE CIDADÁ**

Representante:

- Manuel Mosquera Rodríguez

Suplentes:

- José Luis Lorenzo Blanco con
- Rafael Camilo García Losada
- Patricia Helvira Santamaría Hervella

### **POLÍTICA SOCIAL, IGUALDADE, SANIDADE, XUVENTUDE E VOLUNTARIADO**

Representante:

- Manuel Mosquera Rodríguez.

Suplentes:

- Miguel Ángel de Marcos Silván
- Milagros Fernández Fernández
- Alberto Rivero Fernández

### **MEDIO AMBIENTE E FACENDA**

Representante:

- Manuel Mosquera Rodríguez.

Suplentes:

- José Luis Lorenzo Blanco
- Senén Rodríguez Vázquez
- Patricia Helvira Santamaría Hervella

**Segundo.-** Nomear, de conformidade coa proposta efectuada pola Agrupación Miño de Asociacións Veciñais do Rural e a Periferia de Ourense mediante un escrito con rexistro de entrada WEB2021011857 do 20.08.2021, os representantes dos cidadáns da dita entidade en cada unha das Xuntas de Área do Concello que se indican. O nomeamento farase polo período de dous anos. Antes de que finalice o dito período, a entidade deberá presentar unha nova proposta de nomeamento. Calquera cambio que se produza nos representantes antes da finalización do período de nomeamento deberase comunicar ó Concello.

### **URBANISMO E INFRAESTRUTURAS, EDUCACIÓN, PROMOCIÓN ECONÓMICA, CULTURA, CONTRATACIÓN E PERSOAL**

Representante:

- José Manuel García Casares.

Suplente:

- Lorinda Fernández Faria.
- Rafael Mosquera Gómez.
- Manuel Solveira Pereira.
- Florencio Rodríguez López.
- Ángel Gómez Pazos

### **PARTICIPACIÓN CIDADÁ, TURISMO E TERMALISMO**

Representante:

- Lorinda Fernández Faria.

Suplente:

- Ángel Gómez Pazos
- José Manuel García Casares
- Rafael Mosquera Gómez
- Manuel Solveira Pereira
- Florencio Rodríguez López

### **COMERCIO, SERVIZOS XERAIS E SEGURIDADE CIDADÁ**

Representante:

- Ángel Gómez Pazos.

Suplente:

- Lorinda Fernández Faria.
- José Manuel García Casares
- Rafael Mosquera Gómez.
- Manuel Solveira Pereira.
- Florencio Rodríguez López.

### **POLÍTICA SOCIAL, IGUALDADE, SANIDADE, XUVENTUDE E VOLUNTARIADO**

Representante:

- Ángel Gómez Pazos.

Suplente:

- Lorinda Fernández Faria.
- José Manuel García Casares
- Rafael Mosquera Gómez.
- Manuel Solveira Pereira.
- Florencio Rodríguez López.

### **MEDIO AMBIENTE E FACENDA**

Representante:



## CONCELLO DE OURENSE SECRETARIA XERAL

- Ángel Gómez Pazos.

Suplente:

- Lorinda Fernández Faria.
- José Manuel García Casares
- Rafael Mosquera Gómez.
- Manuel Solveira Pereira.
- Florencio Rodríguez López.

**Terceiro.-** Esta resolución notificaráselle á Federación de AA.VV de Ourense “Limiar” e á Agrupación Miño de Asociacións Veciñais do Rural e da Perifeira de Ourense coa advertencia de que ós representantes das ditas entidades que acudan ás reunións das Xuntas de área fáiselles extensiva o réxime de obrigas previstas para os membros da Corporación recollido no artigo 16.3 do Real decreto 2568/1986, do 28 de novembro, polo que se aproba o Regulamento de organización, funcionamento e réxime xurídico das Entidades Locais (ROF), consistente en gardar reserva en relación coas informacións que se lles faciliten e evitar a reprodución da documentación que lles poida ser facilitada.

**Cuarto.-** Darlle traslado desta resolución aos concelleiros/as presidentes/as das Xuntas de Área respectivas, ó concelleiro-secretario da Xunta de Goberno local e ós funcionarios que realizan por delegación as funcións de secretarios das Xuntas de Área.

**Quinto.-** Darlle conta desta resolución ao Pleno da Corporación na primeira sesión ordinaria que teña lugar, sen prexuízo da súa efectividade dende o mesmo día da súa sinatura.

**Sexto.-** Derrogar o decreto núm. 2020006389 do 16.11.2020.

**Sétimo.-** Contra este acordo que pon fin a vía administrativa, poderase interpor recurso potestativo de reposición no prazo dun mes ante o mesmo órgano que o ditou, ou ben, recurso contencioso-administrativo no prazo de dous meses ante o Xulgado do Contencioso Administrativo de Ourense, sen prexuízo da posibilidade de interpor calquera outro recurso que se estime procedente.

O manda e asina o Excmo. Sr. Alcalde-Presidente, do que eu como oficial maior accidental, dou fe.”

O Concello Pleno deuse por informado.

### **4.- Posta en coñecemento do informe de Tesouraría sobre o período medio de pago correspondente ao mes de xullo de 2021**

#### **INFORME DE TESOURERÍA**

1.- **NORMATIVA APLICABLE:**

A lei 3/2004, de 29 de decembro pola que se establecían as medidas de loita contra a morosidade das operacións comerciais, incorporou ó noso ordenamento xurídico a Directiva 200/35/CE, do Parlamento Europeo e do Consello, de 29 de xuño de 2000.

Transcorridos 5 anos dende a vixencia da citada norma, fíxose necesario a súa adaptación ós cambios producidos no entorno económico e modificación para que sexa aplicable, tanto no ámbito da empresa privada, como no do sector público. Esta modificación levouse a cabo coa Lei 15/2010, de 5 de xullo, de modificación da Lei 3/2004, de 29 e decembro.

O artigo cuarto da citada norma establece:

“3.- Os Tesoureiros ou, na súa falta, Interventores das Corporacións locais elaborarán trimestralmente un informe sobre o cumprimento dos prazos previstos nesta Lei para o pago das obrigacións de cada Entidade local, que incluírá necesariamente o número e contía global das obrigacións pendentes nas que se estea incumprindo o prazo.

4.- Sen prexuízo da súa posible presentación e debate no Pleno da Corporación local, devandito informe deberá remitirse, en todo caso, aos órganos competentes do Ministerio de Economía e Facenda e, no seu respectivo ámbito territorial, aos das Comunidades Autónomas que, con arranxo aos seus respectivos Estatutos de Autonomía, teñan atribuída a tutela financeira das Entidades locais. Tales órganos poderán igualmente requirir a remisión dos citados informes.”

O Real Decreto 635/2014, de 25 de xullo, polo que se desenrolar a metodoloxía de cálculo do período medio de pago a provedores das Administracións Públicas e as condicións e o procedemento de retención de recursos dos rexímenes de financiación, previstos na Lei Orgánica 2/2012, de 27 de abril, de Estabilidade Orzamentaria e Sostenibilidade Financeira”.

Con este Real Decreto dase cumprimento ó que establece a Lei Orgánica de Estabilidade Orzamentaria e Sostenibilidade Financeira, tras a reforma operada pola Lei Orgánica de Control da Débeda no Sector Público, que introduce o concepto de período medio de pago (PMP), como expresión do volume da débeda comercial, e establece a obriga de que todas as Administracións Públicas o apliquen e fagan público.

O obxectivo principal é contribuír a erradicar a morosidade das Administracións Públicas e controlar a débeda comercial, evitando a acumulación de atrasos no pago de facturas ós provedores.

A citada norma ten sido modificada no que se refire á **metodoloxía do cálculo do PMP** polo Real Decreto 1040/2017, de 22 de decembro. Como expón a información emitida polo propio Ministerio de Facenda, trátase con esa modificación de reforzar o cumprimento da normativa europea en materia de loita contra a morosidade, quedando a nova metodoloxía alineada coa normativa nacional, que traspón as directivas comunitarias, iniciándose o cómputo dos prazos, con carácter xeral, dende a aprobación dos documentos que acrediten a conformidade cos bens entregados ou servizos prestados, en lugar do criterio que se aplicaba ata a data, no que o inicio do prazo de cómputo producíase dende os 30 días seguintes á entrada da factura no rexistro administrativo.



**CONCELLO DE OURENSE**  
**SECRETARIA XERAL**

A nova **metodoloxía do cálculo do PMP** non permite que o dato resultante tome valor negativo si a Administración paga antes de trinta días naturais dende a presentación das facturas ou certificacións de obra.

2.- INFORME:

Establece o Real Decreto 635/2014, modificado polo Real Decreto 1040/2017, unha metodoloxía económica común para o cálculo do período medio de pago a provedores, período medio que ven a medir o atraso no pagamento da débeda comercial en termos económicos.

Así, calcularase un período medio de pago global a provedores que comprenderá o de todas as entidades incluídas no artigo 2 da LO 2/2012 e, o período medio de pago de cada entidade. Para o cálculo do período medio de pago o Real Decreto precisa as facturas que deberán ser tidas en conta e sinala, expresamente, aquelas que deberán ser excluídas. Estes cálculos, no caso das Corporacións Locais incluídas no ámbito subxectivo dos artigos 111 e 135 do TRLRFL aprobado por RDL 2/2004, de 5 de marzo, será mensual.

A metodoloxía establecida para o cálculo do período medio de pago a provedores é a seguinte:

**Artigo 4: “Cálculo do período medio de pago global a provedores”**

$\sum$  (período medio de pago de cada entidade \* importe operacións da entidade )

período medio de pago = \_\_\_\_\_

global a provedores  $\sum$  importe operacións das entidades

*“Se entenderá por importe de las operacións da entidade o importe total de pagos realizados e de pagos pendentes nos termos indicados nos artigos seguintes”*

**Artigo 5 (do RD 635/2014 de 25 de xullo, modificado polo RD 1040/2017, de 22 de decembro): “Cálculo do período medio de pago de cada entidade”**

1.- Aos efectos do cálculo do período medio de pago global ao que se refire o artigo anterior, o período medio de pago de cada entidade calcularase de acordo coa seguinte fórmula:

$\text{rateo} = \frac{\text{operación pagada} * \text{importe total pagos realizados} + \text{operación pendiente de pago} * \text{importe total pagos pendientes}}{\text{período}}$

período = \_\_\_\_\_

$\text{importe total pagos realizados} + \text{importe total pagos pendientes}$

2.- Para os pagos realizados no mes, calcularase o cociente das operacións pagas de acordo coa seguinte fórmula:

$\Sigma (\text{número de días de pago} * \text{importe da operación pagada})$

rateo das operacións = \_\_\_\_\_

pagadas  $\text{importe total de pagos realizados}$

Entenderase por número de días de pago, os días naturais transcorridos desde:

- A data de aprobación das certificacións de obra ata a data de pago material por parte da Administración.
- A data de aprobación dos documentos que acrediten a conformidade cos bens entregados ou servizos prestados, ata a data de pago material por parte da Administración.
- A data de entrada da factura no rexistro administrativo, segundo conste no rexistro contable de facturas ou sistema equivalente, ata a data de pago material por parte da Administración, nos supostos nos que ou ben non resulte de aplicación un procedemento de aceptación ou comprobación dos bens ou servizos prestados ou ben a factura recíbese con posterioridade á aprobación da conformidade.

Nos supostos nos que non haxa obrigaçión de dispoñer de rexistro contable, tomarase a data de recepción da factura no correspondente rexistro administrativo.

No caso das facturas que se paguen con cargo ao Fondo de Liquidez Autonómico ou con cargo á retención de importes a satisfacer polos recursos dos réximes de financiamento para pagar directamente aos provedores, considerarase como data de pago material a data da proposta de pago definitiva formulada pola Comunidade Autónoma ou a Corporación Local, segundo corresponda.

3. Para as operacións pendentes de pago ao final do mes calcularase a cociente de operacións pendentes de pago de acordo coa seguinte fórmula:





**CONCELLO DE OURENSE**  
**SECRETARIA XERAL**

$\Sigma$  (número de días pendentes de pago \* importe da operación pendente de pago )

rateo de operacións = \_\_\_\_\_

pendentes de pago *Importe total de pagos pendentes*

Entenderase por número de días pendentes de pago, os días naturais transcorridos desde:

- a) A data de aprobación das certificacións de obra ata o último día do período ao que se refiran os datos publicados.
- b) A data de aprobación dos documentos que acrediten a conformidade cos bens entregados ou servizos prestados ata o último día do período ao que se refiran os datos publicados.
- c) A data de entrada da factura no rexistro administrativo, segundo conste no rexistro contable de facturas ou sistema equivalente, ata o último día do período ao que se refiran os datos publicados, nos supostos nos que ou ben non resulte de aplicación un procedemento de aceptación ou comprobación dos bens ou servizos prestados ou ben a factura recíbese con posterioridade á aprobación da conformidade.

Nos supostos nos que non haxa obrigaçión de dispoñer de rexistro contable, tomarase a data de recepción da factura no correspondente rexistro administrativo.”

Lémbrese que o concello de Ourense ten establecido o procedemento de conformidade de facturas para todos os bens ou servizos prestados polo que lle son de aplicación os apartados a) e b) de cada un dos supostos de cálculo do rateo de operacións pagadas e pendentes de pago

Aplicando a metodoloxía establecida no citado Real Decreto 635/2014 de 25 de xullo, modificado polo Real Decreto Real Decreto 1040/2017, de 22 de decembro, os períodos medios de pago resultantes no mes de XULLO de 2021 son:

	Concello	Consello Municipal de Deportes (*)
Rateo de operacións pagadas	39,49	19,39
Importe de operación pagadas	1.842.548,80 €	51.098,28 €
Rateo de operacións pendentes de pago	56,06	17,00
Importe de operacións pendentes de pago	5.378.095,14 €	12.219,80 €
PMP de cada entidade	51,83	18,93

<b>Período medio de pago global a proveedores</b>	<b>51,54</b>
---	--------------

(\*) datos proporcionados polo administrador do CMD, xúntase documentación xustificativa

No cálculo dos períodos medios de pago, tal e como establece o artigo 3 do Real Decreto 635/2014, só se terán en conta as facturas expedidas dende o 1 de xaneiro de 2014 que consten no rexistro contable de facturas e as certificacións de obra aprobadas dende a esa data. Quedan excluídas as obrigas de pago contraídas entre entidades que teñen a consideración de Administracións Públicas no ámbito da contabilidade nacional, así mesmo, quedan excluídas as obrigas de pago que foron obxecto de retención dende esta Tesourería como consecuencia de embargos, mandamentos de execución, procedementos administrativos de compensación ou actos similares ditados por órganos xudiciais ou administrativos.

Tendo en conta que o período medio de pago global resultante no Concello para o mes de XULLO de 2021 é de **51,54** días, estase a **incumprir** o prazo previsto na Lei 15/2010, de 5 de xullo, de modificación da Lei 3/2004, de 29 e decembro, pola que se establecían as medidas de loita contra a morosidade das operacións comerciais.

A Lei 25/2013, de 27 de decembro, de impulso da factura electrónica e creación do rexistro contable de facturas no Sector Público, establece no artigo 10: “Os órganos ou unidades administrativas que teñan atribuída a función de contabilidade nas Administracións Públicas efectuarán requirimentos periódicos de actuación respecto ás facturas pendentes de recoñecemento de obrigas, que serán dirixidos aos órganos competentes”.

endo en conta o sinalado, achégase como ANEXO I ó presente informe, copia do requirimento efectuado no mes de XULLO de 2021 dende esta Tesourería ós servizos municipais que teñen facturas sen tramitar no rexistro de facturas que tiveron entrada no rexistro xeral do Concello con antigüidade superior a 30 días, (sexa por non estar devoltas, correctamente conformadas ou por presentar algún tipo de defecto subsanable polo servizo esixido dende a Intervención), no que se solicita, á vista dos prazos establecidos pola normativa vixente para a aprobación das facturas, procedan a realizar as actuacións pertinentes que permitan a tramitación do recoñecemento das obrigas.( ANEXO I-1). Nº expediente Cividas 2021030496

Como **ANEXO II**, achégase o informe de resume xerado polo programa de contabilidade no que se recolle o importe total das operacións pagadas e as pendentes de pago correspondentes ó mes de XULLO de 2021 que xeraron os rateos e período medio de pago resultante para o Concello.( ANEXO II-1 e ANEXO II-2)

Como **ANEXO III**, achégase os informes de detalle e resume xerados polo programa de contabilidade no que se recollen as operacións pagadas e as pendentes de pago correspondentes ó mes de XULLO de 2021 que xeraron os rateos e período medio de pago resultante para o Consello Municipal de Deportes, enviados a esta Tesourería dende o Organismo Autónomo.

O Pleno deuse por informado.

## **5.- Parte resolutiva**

### **5.1 Modificación puntual do PXOU de 1986. Cambio de uso da parcela sita en carretera de Vigo, 1B (referencia catastral 2497004NG9826S0001DK), antigamente destinada a estación de autobuses de Ourense.**



**CONCELLO DE OURENSE**  
**SECRETARIA XERAL**

De conformidade co informe xurídico do Servizo de Planeamento e Xestión Urbanística, con data do 8 de agosto de 2021, e a proposta que contén da Concellería de Urbanismo, con data do 12 de agosto de 2021, a Comisión de Pleno, por seis votos a favor do Grupo Municipal do Partido Popular, do Grupo Municipal de Democracia Ourenzana, do Grupo Municipal de Ciudadanos e de dona María Teresa Rodríguez Garrido, concelleira non adscrita; e catro abstencións do Grupo Municipal Socialista e do Grupo Municipal do BNG, adopta o seguinte **ACORDO**:

Ditaminar favorablemente e elevar ao Pleno a seguinte proposta:

*1º) Aprobar, a pedimento da Xunta de Galicia – Consellería de Política Social – Secretaría XeralTécnica, a Modificación Puntual do Plan Xeral de Ordenación Urbana de 1986 para o cambio de uso parcial da parcela sita na Estrada de Vigo, 1B (referencia catastral 2497004NG9826S0001DK) antigamente destinada de xeito parcial a Estación de Autobuses de Ourense, e da súa contorna pasando as partes da mesma e da contorna cualificadas co uso de sistema xeral de transportes e comunicaciónes ós usos de sistema xeral de equipamento asistencial, sistema local de equipamento deportivo e sistema local de zonas de esparcemento e parques, segundo a documentación técnica obrante no expediente de data 12 de xullo de 2021 e co CSV FG607QL6A3T791K7.*

*2º) Ordear a publicación de dita documentación técnica no Diario Oficial de Galicia, ó abeiro do disposto nos arts. 82.2 da Lei de Galicia 2/2016 e 199.2 do seu Regulamento.*

*3º) Remitir a presente modificación puntual ó Rexistro de Planeamento Urbanístico de Galicia, o abeiro dos arts. 88 da Lei de Galicia 2/2016 e 209 do seu Regulamento*

*Todo elo en base ós informes emitidos polo Servizo de Planeamento e Xestión Urbanística (técnicos de datas 9 de xuño de 2021 e 12 de xullo de 2021 e xurídicos de datas 10 de xuño de 2021 e 11 de agosto de 2021), que se integran no presente acordo coma motivación do mesmo e dos que se dará traslado á administración autonómica promotora mediante copia simple dos mesmos que serán achegados xunto coa notificación que diste acordo sexa practicada.*

### **RÉXIME DE RECURSOS**

*Contra este acordo, que pon fin á vía administrativa, non pode interpoñerse recurso de reposición potestativo ante o órgano que o ditou o abeiro do disposto nos arts. 84.1 da Lei de Galicia 2/2016 e 201.1 do seu Regulamento, por tratarse dunha disposición de carácter xeral.*

*Cabe interpoñer directamente recurso contencioso-administrativo, ante o Tribunal Superior de Xustiza de Galicia, no prazo de dous meses, a contar desde o día seguinte ao da recepción da notificación do mesmo ou da súa publicación, de conformidade cos artigos 8.1; 10. 1. a) e 46 da Lei 29/1998, de 13 de xullo, da Xurisdición Contencioso-Administrativa.*

*Todo iso sen prexuízo de que poida interpoñerse calquera outro recurso ou acción que estime procedente.*

O Pleno do Concello, por trece votos a favor do Grupo Municipal do PSdeG-PSOE, do Grupo Municipal do Bloque Nacionalista Galego e de dona María Teresa Rodríguez Garrido, dona María del Mar Fernández Dibuja e don José Miguel Caride Domínguez, concelleiros non adscritos; e doce votos en contra do Grupo Municipal do Partido Popular, do Grupo Municipal de Democracia Ourensana, do Grupo Municipal de Ciudadanos e de don Laureano Bermejo Ansia, concelleiro non adscrito, adoptou o seguinte **ACORDO**: Retirar o asunto da orde do día.

### **5.2 Moción do Grupo Municipal do Bloque Nacionalista Galego relativa á actualización da ordenanza fiscal nº 15, reguladora das taxas por aproveitamento especial ou utilización privativa do dominio público local, coa incorporación de exencións ao pago de taxas para as iniciativas promovidas sen ánimo de lucro**

## **EXPOSICIÓN DE MOTIVOS**

No pleno celebrado o pasado 06 de xullo de 2018 e como consecuencia dunha moción presentada polo Grupo Municipal de Ourense en Común, a corporación debatíu, e aprobou por unanimidade, a necesidade de modificar a Ordenanza Fiscal número 15 do Concello de Ourense relativa á Regulación das Taxas polo Aproveitamento ou Utilización da Vía Pública.

O punto de acordo de dita moción, instaba o Goberno Local de entón a iniciar os trámites necesarios para a actualización da Ordenanza pero sen especificar claramente en que termos ou en que sentido.

Ben é certo que profundizando na exposición de motivos e no debate suscitado durante o pleno, o que se plantexaba era que aquelas asociacións, colectivos ou entidades que promoveran iniciativas sen ánimo de lucro no espazo público do concello non fosen penalizados co pagamento dunha taxa.

Durante o citado debate, estableceuse a necesidade de distinguir entre aquelas actividades promovidas cun claro carácter mercantil e co obxecto de obter un beneficio económico, para o cal, todos os membros da corporación entendían preciso ter que abonar a taxa correspondente pola ocupación do espazo público, mais tamén, a necesidade de exonerar de ditas taxas a aquelas actividades que se formulasen sen ánimo de lucro.

Desde o BNG entendemos preciso retomar esta cuestión e ir un pouco máis alá a hora de deixar claro e na propia ordenanza dita exención, e é por iso que plantexamos a través da presente moción que todas aquelas asociacións, colectivos, entidades ou mesmo particulares que promovan iniciativas sen ánimo de lucro na vía pública do Concello de Ourense estén exentos do pago de taxa algunha por dita ocupación.



## CONCELLO DE OURENSE SECRETARIA XERAL

Tal e como se comentou en dita sesión, en xullo de 2018, as rúas, prazas e parques son o espazo para o encontro da veciñanza e para a interacción social. Falamos de lugares comúns a todas e todos e polo tanto onde poder crear, expresarse, celebrar, informar e mesmo protestar ou reivindicar.

Humanizar ás cidades e convertilas en lugares agradables e onde as persoas sexan a prioridade é unha constante desde fai algúns anos. Falamos de cidades accesíbeis, pacificadas desde o punto de vista do tráfico e onde o espazo público reservado ao encontro da veciñanza e o lecer vai gañando cada vez máis terreo. Actualmente a aposta da meirande parte das urbes pasa polo acondicionamento de amplas zonas verdes e espazos de convivencia e esparcemento, algo que ademáis se viu incrementado coa pandemia da COVID-19, pandemia que pon de manifesto a necesidade de contar con cidades moito máis humanizadas.

Entendemos polo tanto que os espazos públicos son lugares nos que o desenvolvemento de actividades de carácter cultural, social, deportivo, ou de calquera outra índole, repercuten positivamente na veciñanza ao tempo que rachan coa discriminación ao igualarnos e darnos a oportunidade de participar de ditas actividades nun espazo que ademáis é de todas e todos.

A comunicación previa ao Concello e mesmo a necesidade de contar con autorización, previos informes, de ser o caso, de Policía Local, Bombeiros ou mesmo dos técnicos de medio ambiente se falamos dun espazo verde, é necesaria para o bo funcionamento de ditas actividades, para a propia conservación do espazo público a ocupar e mesmo por cuestións de seguridade, mais desde o BNG non entendemos necesario ter que abonar taxa algunha cando estamos a falar de actividades ou iniciativas gratuítas e sen ánimo de lucro.

É preciso favorecer e promover a participación cidadá así como a todas aquelas entidades, asociacións ou colectivos que desenvolven un papel importantísimo de dinamización social e cultural dentro do noso concello. Un papel importantísimo na conservación e promoción da cultura e do saber ou mesmo un papel importantísimo na reivindicación e denuncia social.

Por todo o anterior, o Grupo Municipal do BNG no Concello de Ourense solicita do pleno da corporación a adoción do seguinte

### **ACORDO**

- 1.** Instar ao Goberno Local do Concello de Ourense a modificar a Ordenanza Fiscal número 15, Reguladora das Taxas por Aproveitamento Especial ou Utilización Privativa do Dominio Público Local para introducir a exención no pago de taxas a todas aquelas actividades, iniciativas ou campañas promovidas por asociacións, entidades ou colectivos sen ánimo de lucro.

## **Emenda presentada polo Grupo Municipal do PSdeG-PSOE**

### **EMENDA DE ENGÁDEGA:**

#### **PUNTOS DA PROPOSTA:**

1. Instar ao Goberno local do Concello de Ourense a modificar a Ordenanza Fiscal número 15, Reguladora das Taxas por Aproveitamento Especial ou Utilización Privativa do Dominio Público Local para introducir a exención no pago de taxas a todas aquelas actividades, iniciativas ou campañas promovidas por asociacións, entidades ou colectivos sen ánimo de lucro.

#### **TEXTO DE ENGÁDEGA:**

1. Instar ao Goberno local do Concello de Ourense a redactar unha Ordenanza Reguladora de Aproveitamento de Espazos Públicos.

#### **SENDO OS SEGUINTE PUNTOS DE ACORDO OS DEFINITIVOS:**

1. Instar ao Goberno local do Concello de Ourense a modificar a Ordenanza Fiscal número 15, Reguladora das Taxas por Aproveitamento Especial ou Utilización Privativa do Dominio Público Local para introducir a exención no pago de taxas a todas aquelas actividades, iniciativas ou campañas promovidas por asociacións, entidades ou colectivos sen ánimo de lucro.
2. Instar ao Goberno local do Concello de Ourense a redactar unha Ordenanza Reguladora de Uso de Espazos Públicos.

O Pleno do Concello, por vinte e dous votos a favor do Grupo Municipal do PSdeG-PSOE, do Grupo Municipal do Partido Popular, do Grupo Municipal de Ciudadanos, do Grupo Municipal do Bloque Nacionalista Galego e de dona María Teresa Rodríguez Garrido, dona María del Mar Fernández Dibuja, don José Miguel Caride Domínguez e de don Laureano Bermejo Ansia, concelleiros non adscritos; e tres votos en contra do Grupo Municipal de Democracia Ourensana, adoptou o seguinte **ACORDO**: Aprobar a emenda do PSOE.

En consecuencia, queda aprobada a moción coa redacción dada pola emenda do Grupo Municipal do PSdeG-PSOE.



## CONCELLO DE OURENSE SECRETARIA XERAL

### **5.3 Moción do Grupo Municipal do PSdeG-PSOE para instar ao Concello de Ourense a que poña en marcha un plan de choque urxente para sacar do abandono total os parques infantís e zonas verdes da cidade**

#### **EXPOSICIÓN DE MOTIVOS**

Os socialistas denunciámos xa en numerosas ocasións durante o presente mandato e tamén no anterior que, a pesar de que o goberno municipal conta dende fai tempo cunha auditoría sobre o estado dos parques e zonas verdes da cidade, e tamén está listo un informe de actuacións necesarias e urxentes nas zonas recreativas dende a Concellería de Medio Ambiente, prefiren priorizar o gasto en asesores ou rampas mecánicas e seguir a adiar a atención aos servizos básicos para a cidadanía, convertendo Ourense nunha auténtica selva abandonada para cativos e familias.

En todos os barrios de Ourense podemos atopar numerosos exemplos de zonas de xogo infantís e espazos de lecer sen ningún tipo de mantemento nin sequera renovación dos aparellos, pendentes de reforma ou clausuradas, *en tempos nos que o xogo ao aire libre é imprescindible e nos que deberíamos garantir que fora nas mellores condicións posibles para os máis pequenos.*

**Á grave situación dos parques infantís hai que sumarlle a precaridade aínda do contrato de conservación e mantemento de zonas verdes, paralizado e pendente de nova adxudicación, ou tamén a ausencia aínda dun estudo para a protección do patrimonio arbóreo da cidade.**

Consideramos que non se pode esperar máis para abordar reformas globais ou parciais nas zonas infantís de xogo e o actual goberno municipal debe poñerse mans á obra.

**A radiografía dos parques urbanos infantís e da zona rural é clara:** columpios vellos, chan levantado, fochancas, aínda sen adaptar á normativa europea nin sequera para facelos máis accesibles, aparellos oxidados ou rotos con elementos que supoñen riscos para os máis pequenos, sen iluminación suficiente ou carentes dela, sen repoñerse ou dotalos de árbores, etc.

Nunha reunión con varios colectivos do **barrio da Ponte**, o máis populoso da cidade, Jácome comprometeuse antes do verán a abordar a mellora dos parques da zona ante a preocupante situación que presentan, e que en moitos casos teñen pendentes e proxectadas reformas paralizadas polo actual rexidor. Máis tarde, o 22 de abril, o alcalde anunciaba publicamente que o Concello acometería a renovación integral e posta en valor das áreas de xogo infantís da cidade cun investimento de 1,1 millóns de euros que permitirían renovar o pavimento, os elementos de xogo e o mobiliario auxiliar de 19 zonas

da cidade. Máis de catro meses despois do anuncio, seguimos agardando por estas actuacións.

O certo é que só se precisa vontade política para a reforma integral necesaria do **Parque do Peco** ou do de **Xesús Pousa**, para acondicionar ou realizar melloras noutros como o **Parque San Rosendo** ou o na **Alameda da Ponte** (despois da oportunidade perdida pola Xunta de Galicia coa reforma realizada no anterior mandato que rematou en chapuza); ou para mellorar outros como o da rúa San Froilán ou o da rúa Ribeiriño, todos eles con zonas infantís totalmente obsoletas e defenestradas na actualidade e con gran afluencia das familias.

Non se pode esquecer tampouco as múltiples queixas dos veciños do **barrio do Pino**, do entorno da antiga estación de autobuses, que finalmente puideron a lo menos acadar a reposición de árbores recentemente, despois de meses agardando polo executivo municipal.

No **barrio do Couto**, temos parques emblemáticos tamén abandonados á súa sorte, como o **Parque das Aventuras** ou a zona recreativa do **Barbaña**, ou o da rúa **Gregorio Fernández**; e tamén no entorno da **Carballeira**, na rúa **Carriarico** ou a **Praza da Lexión**. Non se pode esquecer tampouco a falta de previsión municipal en connivencia coa Xunta de Galicia, que levará por diante un pulmón verde da cidade como é o **Parque do Couto** e previsiblemente, pola súa falta de dilixencia e descoñecemento, fará o mesmo co **Parque das Letras**. Todo para facer un skate park en dúas fases que non se adapta ás necesidades nin dos usuarios e que aínda por riba rexeita a veciñanza.

No **barrio do Vinteún**, o exemplo máis claro de desleixo e o **Parque de Santa Teresita**, o punto de encontro e zona de ocio central, carente de mantemento sequera nos últimos tempos para un lugar de construción relativamente recente.

No **barrio de San Francisco e Mariñamansa**, máis do mesmo, só temos que observar o **Parque das Zapatillas** ou o entorno de **A Cuña**, de pouco vale abrir ao público novas zonas infantís se logo se deixan totalmente de man pola irresponsabilidade municipal.

Nos últimos plenos municipais xa falamos da necesidade dunha reforma integral do **Parque 25N de Reza** a proposta do PSdeG-PSOE e tamén de retomar o proxecto definitivo para poñer en valor o **Xardín do Posío**, que está paralizado dende a saída do goberno do PP.

E todo isto máis aínda despois do espolio vivido no **Parque Miño**, outro lugar de gran singularidade e valor histórico para os veciños de Ourense, que reflicte claramente a desprotección e abandono das zonas verdes que vivimos na actualidade.





**CONCELLO DE OURENSE**  
**SECRETARIA XERAL**

**Poderíamos continuar así eternamente, nomeando zonas, parques, espazos verdes urbanos e do extrarradio de Ourense, que aínda están peor se cabe.** Por este motivo, consideramos imprescindible de cara ao período estival que imos afrontar proximamente, tomar decisións e pñer fin a esta decadencia dos últimos anos dunha vez por todas, esixindo ao actual goberno municipal que antes de afrontar macroproxectos inviables ou outros que responden aos intereses dunha minoría, debemos priorizar o máis básico e necesario: que os ourensáns e as súas familias disfruten de espazos de lecer seguros, adaptados e renovados.

Por todo o **exposto**, o Grupo Municipal Socialista presenta neste Pleno, para a súa aprobación, a seguinte proposta de **ACORDO**:

**1. Instar ao Goberno Municipal a que execute un plan de choque urxente para reformar, acondicionar e mellorar toda a rede de parques infantís e zonas verdes de Ourense antes do verán, unha vez obtida a diagnose da situación na que se atopan e que os técnicos municipais avalen o cronograma de actuacións necesarias a executar, comprometendo o orzamento preciso a tal efecto.**

**Emenda presentada polo Grupo Municipal do Bloque Nacionalista Galego**

**EMENDA DE ENGÁDEGA:**

TEXTO INICIAL DA PROPOSTA DE ACORDO

1. Instar ao Goberno Municipal a que execute un plan de choque urxente para reformar, acondicionar e mellorar toda a rede de parques infantís e zonas verdes de Ourense antes do verán, unha vez obtida a diagnose da situación na que se atopan e que os técnicos municipais avalen o cronograma de actuacións necesarias a executar, comprometendo o orzamento preciso a tal efecto.

PROPOSTA DE ENGÁDEGA

2. Instar ao Goberno Local do Concello de Ourense a incrementar o número de membros da brigada encargada do mantemento e supervisión dos parques infantís e dotala dos medios materiais precisos para o bo desenvolvemento do seu traballo.

REDACCIÓN FINAL DA PROPOSTA DE ACORDO

1. Instar ao Goberno Municipal a que execute un plan de choque urxente para reformar, acondicionar e mellorar toda a rede de parques infantís e zonas verdes de Ourense antes do verán, unha vez obtida a diagnose da situación na que se atopan e que os técnicos municipais avalen o cronograma de actuacións necesarias a executar, comprometendo o orzamento preciso a tal efecto.

2. Instar ao Goberno Local do Concello de Ourense a incrementar o número de membros da brigada encargada do mantemento e supervisión dos parques infantís e dotala dos medios materiais precisos para o bo desenvolvemento do seu traballo.

O Pleno do Concello, por catorce votos a favor do Grupo Municipal do PSdeG-PSOE, do Grupo Municipal de Ciudadanos, do Grupo Municipal do Bloque Nacionalista Galego e de dona María Teresa Rodríguez Garrido, dona María del Mar Fernández Dibuja e don José Miguel Caride Domínguez, concelleiros non adscritos; e dez abstencións do Grupo Municipal do Partido Popular, do Grupo Municipal de Democracia Ourensana e de don Laureano Bermejo Ansia, concelleiro non adscrito, adoptou o seguinte **ACORDO**: Aprobar a emenda do BNG.

En consecuencia, queda aprobada a moción coa redacción dada pola emenda do Grupo Municipal do Bloque Nacionalista Galego.

#### **5.4 Moción do Grupo Municipal do PSdeG-PSOE para instar ao goberno municipal a recuperar a xestión municipal da Casa de Acollida de Ourense, favorecendo un modelo de funcionamento público e directo a partir do ano 2022**

### **EXPOSICIÓN DE MOTIVOS**

No ano **2019**, a xestión da **Casa de Acollida de Ourense**, anteriormente levada a cabo dende o Concello de Ourense, **foi transferida e asumida pola Xunta de Galicia, ante a incapacidade do anterior goberno do PP e logo de DO e PP de sacar adiante o seu contrato de xestión**, que quedou deserto e sen cubrir pola falta de ofertas, motivado polo insuficiente orzamento de licitación: só 100.000 €.

Nos últimos dous anos de funcionamento pasaron por este espazo **44 mulleres e 31 menores de idade**, sendo o titular do centro de acollida a **Fundación Amaranta**, como anteriormente cando este dependía do Concello de Ourense.

A Casa de Acollida é un lugar clave para a atención, recuperación e protección das vítimas de violencia de xénero e un soporte vital a nivel psicolóxico, educativo, sociolaboral e xurídico para normalizar a súa situación individual e familiar, ademais de contribuír a superar os efectos da violencia.



**CONCELLO DE OURENSE**  
**SECRETARIA XERAL**

Nela garántese a cobertura das súas necesidades básicas, a orientación na toma de decisións, a súa regulación emocional, a mellora da súa empregabilidade e tamén a mellora da súa saúde e benestar e a das súas crianzas.

**Dende o noso grupo municipal consideramos fundamental a recuperación da xestión municipal da Casa de Acollida no vindeiro ano 2022**, como así o comprometeu a actual concelleira de Benestar Social, Dna. Eugenia Díaz Abella, perante os grupos municipais en varias xuntas de área.

Do mesmo xeito, consideramos que durante este mandato podería producirse un punto de inflexión, porque se conta con remanente de tesourería e activos financeiros e está en marcha a configuración e futura aprobación da nova Relación de Postos de Traballo do Concello de Ourense, para **garantir a súa xestión pública e directa municipal con traballadores e traballadoras do Concello de Ourense, asumindo así as súas competencias integramente, como vén sendo unha demanda histórica na nosa cidade.**

**Exemplo de xestión directa municipal de centros de acollida son os concellos de Vigo e A Coruña.** Vigo conta co Centro de Emerxencia para Mulleres (CENVI), con capacidade para 20 persoas e A Coruña cunha Rede de Acollida da que forman parte a Casa de Acollida ás Mulleres Vítimas de Violencia de Xénero (CAM) con capacidade para 19 persoas e dous Pisos de Transición para a Vida Autónoma (PITVA) con capacidade para 11.

Por todo o exposto, o Grupo Municipal Socialista presenta neste Pleno, para a súa aprobación, as seguintes propostas de **ACORDOS**:

- 1. Instar ao Goberno Municipal a que proceda á recuperación da xestión municipal da Casa de Acollida no vindeiro ano 2022, actualmente dependente da Xunta de Galicia.**
- 2. Instar ao Goberno Municipal á creación dos postos necesarios na nova Relación de Postos de Traballo do Concello de Ourense para poder levar adiante a xestión pública e directa municipal da Casa de Acollida nos próximos anos.**

**Emenda presentada polo Grupo Municipal do Bloque Nacionalista Galego**

**EMENDA DE SUBSTITUCIÓN:**

TEXTO INICIAL DA PROPOSTA DE ACORDO

1. Instar ao Goberno Municipal a que proceda á recuperación da xestión municipal da Casa de Acollida no vindeiro ano 2022, actualmente dependente da Xunta de Galicia.
2. Instar ao Goberno Municipal á creación dos postos necesarios na nova Relación de Postos de Traballo do Concello de Ourense para poder levar adiante a xestión pública e directa municipal da Casa de Acollida nos próximos anos.

### PROPOSTA DE SUSTITUCIÓN

1. Instar o Goberno Local e a Xunta de Galiza á sinatura dun convenio de colaboración para dotar ao Concello de Ourense dunha Casa de Acollida para mulleres e menores vítimas da violencia machista, de xestión pública directa por parte da Xunta de Galiza.

O Pleno do Concello, por dous votos a favor do Grupo Municipal do Bloque Nacionalista Galego; dezaioito votos en contra do Grupo Municipal do PSdeG-PSOE, do Grupo Municipal do Partido Popular, do Grupo Municipal de Democracia Ourensana e de don Laureano Bermejo Ansia, concelleiro non adscrito; e catro abstencións do Grupo Municipal de Ciudadanos e de dona María Teresa Rodríguez Garrido, dona María del Mar Fernández Dibuja e don José Miguel Caride Domínguez, concelleiros non adscritos, adoptou o seguinte **ACORDO**: Rexeitar a emenda do BNG.

O Pleno do Concello, por unanimidade dos presentes, adoptou o seguinte **ACORDO**: Aprobar o punto un da moción.

O Pleno do Concello, por trece votos a favor do Grupo Municipal do PSdeG-PSOE, do Grupo Municipal do Bloque Nacionalista Galego e de dona María Teresa Rodríguez Garrido, dona María del Mar Fernández Dibuja e don José Miguel Caride Domínguez, concelleiros non adscritos; dez votos en contra do Grupo Municipal do Partido Popular, do Grupo Municipal de Democracia Ourensana e de don Laureano Bermejo Ansia, concelleiro non adscrito; e unha abstención do Grupo Municipal de Ciudadanos, adoptou o seguinte **ACORDO**: Aprobar o punto dous da moción.

### **5.5 Moción do Grupo Municipal do Bloque Nacionalista Galego relativa á captación de fondos do denominado Plan de recuperación e resiliencia da Unión Europea**

### EXPOSICIÓN DE MOTIVOS



## **CONCELLO DE OURENSE**

### **SECRETARIA XERAL**

O vindeiro 30 de setembro de 2021 finaliza o prazo para a presentación de proxectos á primeira convocatoria dos fondos de recuperación europea Next generation, e máis concretamente, á convocatoria aberta polo Ministerio de Transportes e Mobilidade para capitais de provincia e cidades de máis de 20.000 habitantes.

O Goberno do Estado e os concellos veñen de acordar os criterios para a repartición de algo máis de 8 mil millóns de euros, dos 70 mil millóns comprometidos a través dos mencionados con anterioridade, Fondos Next Generation, coloquialmente coñecido como Plan de recuperación. Entre os plans obxecto de subvencións, destacan dous que ao noso xuízo resultan de gran interese, tanto pola tipoloxía como pola situación actual do noso concello. Estamos a falar do Impulso á sustentabilidade por unha banda e liñas de apoio ao comercio local por outra.

O primeiro dos proxectos abre aos concellos o reparto de 1.000 millóns de euros, destinados a catro obxectivos: Implementación de baixas emisións, Mobilidade activa, Transporte público, renovación de flota de autobuses e Impulso á dixitalización dos servizos públicos de transporte.

No “Libro branco do transporte: Folla de ruta cara un espazo único europeo de transporte”: por unha política de transportes competitiva e sostible de 2021“, pónense de manifesto as oportunidades e as ameazas que este novo fenómeno expón ás administracións, a diferentes niveis, pero basicamente na contaminación asociada á mobilidade motorizada. Un dos principais requisitos esixidos nas bases da convocatoria é que o solicitante conte cun Plan de Mobilidade Urbana Sostible (PMUS), documento que o Concello de Ourense xa ten aprobado desde o ano 2019.

A Estratexia e Mobilidade Sostible (EEMS), enmarcada na decisión da Comisión delegada de Goberno de cambio Climático de xullo de 2008, na cal se aprobaron liñas estratéxicas en materia de loita contra o cambio climático é outro claro exemplo.

Dentro das súas medidas, préstase especial atención ao fomento dunha mobilidade alternativa ao vehículo privado e o uso dos modos máis sostibles, sinalando a necesidade de abordar o tema da mobilidade desde a planificación urbanística. Para a súa implantación son necesarios instrumentos de coordinación das administracións, por exemplo, a Rede de Cidades polo Clima, Rede de Redes de Desenvolvemento Local Sostible, o Consello Nacional do Clima, Mesas Sectoriais, o Observatorio da Mobilidade Metropolitana e distintos Foros da mobilidade existentes, que avogan por unha maior participación dos diferentes axentes implicados.

Mais os concellos teñen que moverse con rapidez, especialmente os que aínda non fixeron os deberes, pois o prazo para presentar proxectos e solicitar axudas remata, como xa dixemos, o 30 de setembro.

Outro proxecto de gran interese para o concello, polo peso que ten nosa na economía, son as subvencións dirixidas ao comercio local. Estamos a falar de 415 millóns de euros a través de 3 liñas. A primeira está dirixido ao apoio a mercados, zonas urbanas comerciais e canles curtas de comercialización. Esta liña conta cunha dotación de algo máis de 200 millóns de euros. O obxectivo é financiar o desenvolvemento, por parte dos concellos, de plans e proxectos de contido tecnolóxico, innovador e de sostibilidade, así como mellorar os equipamentos no seu sector comercial.

A segunda liña está inspirada no concepto “mercado sustentable”, e dirixida a mercados rurais, cun aporte de 15 millóns. E a terceira destínase ao fortalecemento do comercio en zonas turísticas e dirixidas especificamente a apoiar aqueles establecementos comerciais situados en zonas estratéxicas e cuxa contía chega ate os 100 millóns de euros.

Desde o BNG, rexistramos en decembro de 2020 unha moción relativa a creación da mesa para a recuperación económica e social de Ourense para a elaboración dun plan consensuado de recuperación socio-económica do concello na que participen todos os sectores da sociedade e no que se concreten os proxectos de cidade que poderían optar a ditos fondos europeos de recuperación.

Entendemos que o Concello de Ourense non debe deixar pasar a oportunidade de optar a estes fondos, aínda que por desgraza, temos un goberno municipal máis preocupado por desmantelar servizos e por actuar como lobista privado que por tentar acadar financiamento para o desenvolvemento de proxectos sustentábeis e de futuro para a terceira cidade máis grande e importante do país.

Por todo o anterior, o Grupo Municipal do BNG no Concello de Ourense solicita do pleno da corporación a adoción dos seguintes

## **ACORDOS**

- 1.** Instar ao Goberno Local do Concello de Ourense á convocatoria urxente da mesa pola mobilidade a fin de poder estudar os proxectos que dentro deste ámbito, poderían optar aos fondos que o Ministerio de Transportes, Mobilidade e Axenda Urbana ven de por en marcha e no que se mobilizan un total de 1.000 millóns de euros.
- 2.** Instar ao Goberno Local do Concello de Ourense a convocar con carácter de urxencia ao sector do comercio local do concello para estudar e avaliar os proxectos que dentro do seu ámbito, poidan ser obxecto dos fondos europeos para a recuperación.
- 3.** Instar ao Goberno Local do Concello de Ourense á convocatoria urxente da mesa para a recuperación económica e social co obxecto de avaliar e definir os proxectos de cidade que poderían ser obxecto de financiamento por parte dos Fondos europeos para a recuperación.



**CONCELLO DE OURENSE**  
**SECRETARIA XERAL**

**Emenda presentada polo Grupo Municipal do PSdeG-PSOE**

**EMENDA DE SUBSTITUCIÓN:**

**SUBSTITUCIÓN DOS PUNTOS DA PROPOSTA:**

1. Instar ao Goberno local do Concello de Ourense á convocatoria urxente da mesa da mobilidade a fin de poder estudar os proxectos que dentro deste ámbito, poderían optar aos fondos que o Ministerio de Transportes, Mobilidade e Axenda Urbana vén de pór en marcha e no que se mobilizan un total de 1.000 millóns de euros.
2. Instar ao Goberno local do Concello de Ourense a convocar con carácter de urxencia ao sector do comercio local do Concello para estudar e avaliar os proxectos que dentro do seu ámbito, poidan ser obxecto dos fondos europeos para a recuperación.
3. Instar ao Goberno Local do Concello de Ourense á convocatoria urxente da mesa para a recuperación económica e social co obxecto de avaliar e definir os proxectos de cidade que poderían ser obxecto de financiamento por parte dos Fondos Europeos para a recuperación.

**POLOS SEGUINTES:**

1. Instar ao Goberno Municipal á **constitución e convocatoria urxente da Comisión de Seguimento do Plan de Mobilidade Urbana Sostible do Concello de Ourense** cos obxectivos de:
  - a. Estudar e presentar proxectos axeitados e consensuados por parte do Concello de Ourense para optar ás axudas europeas recollidas no Plan de Recuperación, Transformación e Resiliencia (PRTR) do Goberno de España para a Mobilidade Sostible, antes do 30 de setembro do presente ano.
  - b. Activar ou implantar todas as accións e medidas recollidas no PMUS para este ano e os próximos, e que estiveron paralizadas ata o de agora (Oficina Municipal de Mobilidade, Adhesión á Rede de Cidades que Camiñan, Metrominuto, novas ordenanzas de espazo público e tráfico, campañas informativas, etc.)
  - c. Configurar e presentar unha programación de actividades para a Semana da Mobilidade en Ourense, do 16 ao 23 de setembro,

despois de dous anos sen ningún tipo de programa municipal nesas datas.

### **SENDO OS SEGUINTE PUNTOS DE ACORDO OS DEFINITIVOS:**

1. **Instar ao Goberno Municipal á constitución e convocatoria urxente da Comisión de Seguimento do Plan de Mobilidade Urbana Sostible do Concello de Ourense cos obxectivos de:**
  - a. **Estudar e presentar proxectos axeitados e consensuados por parte do Concello de Ourense para optar ás axudas europeas recollidas no Plan de Recuperación, Transformación e Resiliencia (PRTR) do Goberno de España para a Mobilidade Sostible, antes do 30 de setembro do presente ano.**
  - b. **Activar ou implantar todas as accións e medidas recollidas no PMUS para este ano e os próximos, e que estiveron paralizadas ata o de agora (Oficina Municipal de Mobilidade, Adhesión á Rede de Cidades que Camiñan, Metrominuto, novas ordenanzas de espazo público e tráfico, campañas informativas, etc.)**
  - c. **Configurar e presentar unha programación de actividades para a Semana da Mobilidade en Ourense, do 16 ao 23 de setembro, despois de dous anos sen ningún tipo de programa municipal nesas datas.**

*As moción 5.5 e 5.7 da orde do día debátense conxuntamente, procedendo á súa reenumeración.*

O Pleno do Concello, por dezaseis votos a favor do Grupo Municipal do PSdeG-PSOE, de don Jesús Vázquez Abad do Grupo Municipal do Partido Popular, do Grupo Municipal de Ciudadanos, do Grupo Municipal do Bloque Nacionalista Galego e de dona María Teresa Rodríguez Garrido, dona María del Mar Fernández Dibuja, don José Miguel Caride Domínguez e de don Laureano Bermejo Ansia, concelleiros non adscritos; nove abstencións do resto do Grupo Municipal do Partido Popular e do Grupo Municipal de Democracia Ourensana, adoptou o seguinte **ACORDO**: Aprobar a moción.

**5.6 Moción do Grupo Municipal de Ciudadanos relativa ao programa de axudas a concellos para a implantación de zonas de baixas emisións e a transformación dixital e sostible dun transporte urbano**

#### **Exposición de motivos:**





## CONCELLO DE OURENSE SECRETARIA XERAL

Logo da Declaración da Organización Mundial da Saúde da Pandemia Internacional causada pola COVID-19 o 11 de marzo de 2020, os Estados membros da Unión Europea adoptaron medidas de emerxencia para protexer a saúde da cidadanía e evitar o colapso da economía.

O Consello Europeo do 21 de xullo de 2020 acordou un paquete de medidas de gran alcance, entre as cales destaca a posta en marcha do Fondo Europeo de Recuperación Next Generation EU, e a aprobación do Regulamento (UE) 2021/241 do Parlamento Europeo e do Consello polo que se establece o mecanismo de recuperación e resiliencia.

Neste contexto, aprobouse o 7 de outubro de 2020 o marco xeral do Plan de Recuperación, Transformación e Resiliencia de España, que traza a folla de ruta para a modernización da economía española. Os proxectos que constitúen o Plan de Recuperación Transformación e Resiliencia (PRTR), permitirán a realización de reformas estruturales e permitirán un cambio do modelo produtivo para a recuperación da economía trala pandemia causada pola COVID-19.

O Ministerio de Transportes, Mobilidade e Axenda Urbana (MITMA) lidera tres dos trinta compoñentes incluídos no Plan de Recuperación e Resiliencia, dous deles relacionados coa mobilidade e o transporte (compoñentes 1 e 6), onde se estruturan os investimentos e axudas ao sector dirixidas ás Comunidades Autónomas, administracións locais e empresas.

En concreto, o MITMA lidera, xunto ao Ministerio para a Transición Ecolóxica e Reto Demográfico (MITERD), o Plan de choque de mobilidade sostible, segura e conectada en contornas urbanas e metropolitanas que responde principalmente a dous dos catro eixes do PRTR: transición ecolóxica e dixitalización.

Neste sentido, no 2019 o sector do transporte foi o responsable de o 29% das emisións nacionais de gases de efecto invernadoiro. Delas, case unha terceira parte prodúcese no ámbito urbano polo que é prioritario actuar neste ámbito e a súa contorna para lograr alcanzar o obxectivo de neutralidade climática en 2050. Así, o plan de choque ten, entre os seus obxectivos, que o noso país aposte pola descarbonización na mobilidade urbana e metropolitana e na mellora da calidade do aire nas nosas cidades, investindo en infraestruturas e servizos de mobilidade verde e sostible.

A Lei 7/2021 do 20 de maio, do Cambio Climático e Transición Enerxética establece no artigo 14 a obrigatoriedade dos municipios de máis de 50.000 habitantes e os territorios insulares a aprobar, ata 2023, plans de mobilidade urbana sostible que introduzan medidas para reducir as emisións derivadas da mobilidade incluíndo:

- O establecemento de áreas de baixas emisións (ZBE) antes do 2023.
- Medidas para facilitar o desprazamento a pé, en bicicleta ou outros medios de transporte activo e a construción de corredores verdes

- Medidas para mellorar o uso da rede de transporte público.
- Medidas para a electrificación da rede de transporte público e outros combustibles sen emisións de gases de efecto invernadoiro, como o biometano.
- Medidas para impulsar o uso de transporte eléctrico privado, incluíndo puntos de recarga.
- Medidas de impulso da mobilidade eléctrica compartida.
- Medidas destinadas a promover a distribución de bens e mobilidade sostibles.
- O establecemento de criterios específicos para mellorar a calidade do aire nas escolas, centros sanitarios ou outros centros de sensibilidade especiais, cando sexa necesario de acordo coa normativa sobre a calidade do aire.

As axudas establecidas nesta Orde Ministerial estrutúranse en catro liñas:

- Accións para a implantación de zonas de baixas emisións que inclúen o conxunto de investimentos necesarios para poñelas en funcionamento.
- Medidas dirixidas á transformación dixital e sostible do transporte público e á promoción dunha mobilidade saudable.
- Accións para transformar as flotas de transporte público co fin de cumprir cos obxectivos da Directiva de Vehículos Limpos.
- Accións de dixitalización que redunden nunha maior eficiencia na xestión do tráfico e transporte e na xestión da demanda, así como na análise da información.

Na primeira convocatoria destas axudas dáselle liberdade aos Concellos para presentar os proxectos que, ao seu xuízo, se adapten mellor ás necesidades do seu municipio para promover a creación de ZBE e transformar o seu sistema de transporte público de xeito sostible e dixital. Así, establécense axudas para a transformación de flotas de transporte público a nivel municipal, co fin de contribuír á consecución dos obxectivos da Directiva sobre a promoción de vehículos de transporte por estrada limpos e de eficiencia enerxética (Directiva de Vehículos Limpos).

En concreto, financíase a adquisición de autobuses urbanos con enerxía limpa (eléctricos, hidróxenos), así como a instalación de puntos de recarga eléctrica para estes vehículos. A través desta medida, facilítase que os investimentos necesarios para a transformación non repercutan nos aumentos de tarifas e, polo tanto, promóvese a accesibilidade do servizo de transporte público e tamén se pretende promover a mobilidade activa (camiñar, andar en bicicleta), como formas de mobilidade máis sostibles debido á ausencia de emisións e ao impacto positivo sobre a saúde xeral contribuíndo á redución do sedentarismo.

Ademais, busca proporcionar ás administracións municipais os investimentos necesarios para a provisión dun sistema de transporte público dixital e sostible, así como ferramentas dixitais de xestión do tráfico e da mobilidade. As ferramentas dixitais son



## CONCELLO DE OURENSE SECRETARIA XERAL

fundamentais para optimizar a oferta de transporte e a xestión do tráfico, flexibilizar as horas punta, etc.

En resumo, este programa de subvencións (dirixidas a concellos de máis de 50.000 habitantes e capitais de provincia) contribúen á articulación dun sistema de transporte público urbano fiable, atractivo, accesible e que reduza a contaminación; con flotas de vehículos máis modernas, eficientes e con cero emisións; a introdución dun concepto de mobilidade intelixente adaptado a novos hábitos de mobilidade así como a dixitalización para a planificación, xestión e avaliación por parte das administracións públicas.

Desde o Grupo Municipal de Ciudadanos cremos que temos por diante unha gran oportunidade coa que se poderían aforrar máis de catro millóns de euros na compra da nova flota de autobuses urbanos. Ademais, poderase poñer en marcha o Plan de Mobilidade Urbana Sostible (PMUS), requisito indispensable para solicitar esta axuda e que foi aprobado en decembro de 2019, despois do gran esforzo que supuxo o traballo de preto de dez mil persoas e que tiña como obxectivo conseguir unha cidade máis saudable e sostible.

### **Proposta para a súa aprobación:**

***1.- Instar ao Goberno local a solicitar, en tempo e forma, a axuda para a implantación de zonas de baixas emisións e a transformación dixital e sostible do transporte urbano.***

*As moción 5.5 e 5.7 da orde do día debátense conxuntamente, procedendo á súa reenumeración.*

O Pleno do Concello, por trece votos a favor do Grupo Municipal do PSdeG-PSOE, do Grupo Municipal do Bloque Nacionalista Galego e de dona María Teresa Rodríguez Garrido, dona María del Mar Fernández Dibuja e don José Miguel Caride Domínguez, concelleiros non adscritos; doce abstencións do Grupo Municipal do Partido Popular, do Grupo Municipal de Democracia Ourensana, do Grupo Municipal de Ciudadanos e de don Laureano Bermejo Ansia, concelleiro non adscrito, adoptou o seguinte **ACORDO**: Aprobar a emenda do PSdeG-PSOE.

En consecuencia, apróbbase a moción coa redacción dada pola emenda do PSdeG-PSOE.

**5.7 Moción do Grupo Municipal do PSdeG-PSOE para instar ao concello a mellorar a accesibilidade das persoas con mobilidade reducida ao Centro de Saúde da Cuña e para instar á Xunta de Galicia a fixar un calendario para a construción dun novo centro de saúde na Cuña-Mariñamansa**

## EXPOSICIÓN DE MOTIVOS

Dende que chegou o bigoberno ao Concello de Ourense hai máis de dous anos, o barrio da Cuña está a padecer constantes agravios que ameazan o progreso acadado nesta zona do sur da cidade ao longo dos últimos quince anos. Mostra do desleixo do executivo local co barrio da Cuña foi **a eliminación de case 35 prazas públicas de aparcadoiro nun lugar de gran afluencia** situado en fronte dunha parcela titularidade da Deputación Provincial de Ourense, que se atopa parcialmente cedida ao Concello.

Coñecedores do déficit de zonas de aparcadoiro que afecta á meirande parte dos barrios da cidade, non parece axeitado que o goberno local emprenda medidas destinadas a reducilas, instalando –como fixo nada máis chegar ao Concello– sinalización horizontal e vertical que restrinxe aínda máis as alternativas dos residentes, así como dos usuarios e usuarias do centro de saúde desta zona, para estacionar os seus vehículos.

Estamos a referirnos ao centro de saúde A Cuña-Mariñamansa, inaugurado no ano 1987, e que, a día de hoxe, **presenta evidentes carencias como a falta de espazo para albergar o equipamento necesario que permita garantir a calidade asistencial, ou unha deficiente accesibilidade na contorna**. A primeira cuestión require da atención da Xunta a curto prazo, mentres que a segunda precisa da acción urxente do goberno municipal, polo que a debullaremos máis polo miúdo. Paga a pena lembrar que tales demandas atenden a reivindicacións históricas expresadas tanto por parte da veciñanza como dos usuarios e do persoal sanitario.

En primeiro lugar, non estimamos axeitado manter unha sinal de tráfico na avenida da Universidade, á altura do número 16, que prohibe o aparcamento excepto a vehículos autorizados; como tampouco nos parece acaído o rebaixe existente na beirarrúa, sen haber unha sinal de vao permanente, malia dar entrada a un Centro de Saúde onde se atenden urxencias médicas que requiren un acceso directo, seguro e áxil.

Así mesmo, non consideramos oportuno contar cun paso de peóns na rúa Vasco Díaz Tanco que non coincide co rebaixe do bordo da beirarrúa, á altura do Centro de Saúde, o cal dificulta o acceso das persoas con mobilidade reducida, obrigándoas a teren que dar a volta ata avenida da Universidade.

Estes son só algúns dos exemplos que ilustran **a falta de accesos dignos a un centro de saúde que tampouco conta co espazo necesario para ofrecer atención primaria a unha área de influencia que non deixou de medrar nos últimos anos**. Tanto é así, que o persoal sanitario aumentou de xeito considerable, pasando de nove médicos a 17 e incrementando, de xeito similar, o resto de persoal asistencial e non asistencial que alí desenvolve o seu labor.



**CONCELLO DE OURENSE**  
**SECRETARIA XERAL**

En base ao anteriormente exposto, dende o grupo municipal socialista instamos ao goberno da cidade a **buscar solucións urxentes para a mellora da accesibilidade dos usuarios e traballadores do Centro de Saúde de A Cuña – Mariñamansa**, eliminando as barreiras arquitectónicas existentes e priorizando o paso de vehículos adaptados e ambulancias, así como habilitando prazas para o estacionamento de vehículos de uso sanitario.

Consideramos que estas melloras son perentorias mentres non se poñen en marcha os trámites oportunos para a construción do novo centro de saúde da Cuña – Mariñamansa por parte da Xunta, como está contemplado no **Plan Xeral de Reordenación, Modernización e Mellora da Rede de Centros de Saúde de Atención Primaria**, unha folla de ruta cuxo obxectivo é conseguir que o servizo asistencial básico dependente da administración autonómica sexa o máis axeitado posible ás necesidades actuais, recollidas a través das demandas dos veciños e veciñas de toda a cidade e de xeito singular dos barrios con maior poboación.

Cómpre lembrar que xa no ano 2010 os socialistas facilitaron á Xunta seis posibles localizacións para a construción dun novo centro de saúde no barrio de Mariñamansa, dada a demanda trasladada polos representantes de 18 asociacións do sur da cidade que expuñan que o edificio actual, co paso do tempo, quedou pequeno e non pode albergar o equipamento necesario que demanda previsión de solo para novas infraestruturas sanitarias.

Deste xeito, os socialistas **emprazamos novamente á Xunta de Galicia a fixar de inmediato un calendario definitivo para a execución das obras do novo centro de saúde** co fin de resolver os déficits actuais e ampliar a cobertura os servizos de atención primaria do sur da cidade, contando co compromiso do goberno local para axilizar e formalizar toda a tramitación urbanística precisa de cara á posta a disposición e cesión definitiva de terreos, xestións de licenzas, modificacións precisas, etc.

Por todo exposto, presentamos para a aprobación desta Corporación Municipal as seguintes propostas de **ACORDO**:

**1.- Instar ao Concello de Ourense a buscar solucións urxentes para mellorar a accesibilidade das persoas con mobilidade reducida ao Centro de Saúde da Cuña – Mariñamansa**, atendendo ás reivindicacións históricas do persoal sanitario e dos usuarios e usuarias destas instalacións.

**2.- Instar á Xunta de Galicia a que se comprometa a fixar de inmediato un calendario definitivo para a execución das obras do novo Centro de Saúde da Cuña – Mariñamansa**, para resolver os déficits actuais da atención primaria na zona sur de Ourense.

## **Emenda presentada polo Grupo Municipal do Bloque Nacionalista Galego**

### **EMENDA DE ENGÁDEGA:**

#### TEXTO INICIAL DA PROPOSTA DE ACORDO

1. Instar ao Concello de Ourense a buscar solucións urxentes para mellorar a accesibilidade das persoas con mobilidade reducida ao Centro de Saúde da Cuña – Mariñamansa, atendendo ás reivindicacións históricas do persoal sanitario e dos usuarios e usuarias destas instalacións.
2. Instar á Xunta de Galicia a que se comprometa a fixar de inmediato un calendario definitivo para a execución das obras do novo Centro de Saúde da Cuña – Mariñamansa, para resolver os déficits actuais da atención primaria na zona sur de Ourense.

#### PROPOSTA DE ENGÁDEGA

3. Instar o Goberno Local a mellorar e ampliar as liñas do autobús urbano co obxecto de mellorar a conectividade dos barrios adscritos ao Centro de Saúde da Cuña e favorecer deste xeito a accesibilidade das usuarias e usuarios ao mesmo.

O Pleno do Concello, por unanimidade dos presentes, adoptou o seguinte **ACORDO**: Aprobar a emenda do BNG.

En consecuencia, apróbase a moción coa redacción dada pola emenda do Bloque Nacionalista Galego.

### **5.8 Moción do Grupo Municipal de Ciudadanos relativa á necesidade de instalacións para a práctica da escalada e a ximnasia**

#### **Exposición de motivos:**



## CONCELLO DE OURENSE SECRETARIA XERAL

O pasado mes de xuño, o grupo municipal de Ciudadanos presentou unha moción relativa á falta de infraestruturas para a práctica da escalada en Ourense. Na exposición de motivos faciamos referencia ao gran traballo que leva realizado a Asociación de Escaladores Ourensáns (ASESOU), unha das Escolas de Base máis importantes de toda Galicia e que conseguiu levar este deporte a todos os públicos.

Todo iso, a pesar da falta de instalacións deportivas dunha modalidade en clara expansión en España durante os últimos anos, e que alcanzou a gloria nos xogos olímpicos de Tokio 2021 coa primeira medalla de ouro de Alberto Ginés, un mozo de 18 anos, polo que se espera un incremento da afección por este deporte en Ourense.

A moción deste grupo municipal solicitaba a creación da infraestrutura necesaria para dar cabida á demanda de usuarios simultáneos que existen actualmente en Ourense coas características específicas que marca esta disciplina e que foi aprobada por unanimidade cunha emenda de engádegas do BNG na que ademais se pedía “a inclusión en ditas instalacións, de espazos para a práctica de ximnasia, dada a carencia de instalacións para a práctica da mesma e a compatibilidade que existe entre ambas disciplinas deportivas”, no referente a determinadas características físicas do espazo como á necesidade dunha altura específica.

Todos os grupos municipais cremos no compromiso que debe ter esta cidade co deporte e a necesidade de recoñecer o labor que realizan estes clubs na formación e promoción do deporte, así como a creación de emprego.

Agora ben, é necesario que este pleno chegue ao mesmo acordo para construír unhas instalacións coas características específicas e oficiais para ambas disciplinas que requiren dun espazo propio, polo que desde o grupo municipal cremos que a adquisición do complexo deportivo Bamio, proposta realizada por Democracia Ourensana o pasado mes de decembro e que contou co noso voto a favor, sería unha boa opción para albergar estas disciplinas deportivas nas que a cidade é actualmente deficitaria de instalacións.

### **Proposta para a súa aprobación:**

***1.- Instar ao Goberno local a poñer en marcha os mecanismos administrativos necesarios para a compra e adaptación do complexo deportivo Bamio como unha nova instalación deportiva para a cidade.***

**Emenda presentada polo Grupo Municipal do PSdeG-PSOE**

### **EMENDA DE SUBSTITUCIÓN:**

### **SUBSTITUCIÓN DOS PUNTOS DA PROPOSTA:**

1. Instar ao Goberno local a poñer en marcha os mecanismos administrativos necesarios para a compra e adaptación do complexo deportivo Bamio como unha nova instalación deportiva para a cidade.

#### **POLO SEGUINTE:**

1. Instar ao Goberno local a que dende o Consello Municipal de Deportes se acade o consenso das forzas políticas, escoitando tamén as achegas do colectivo de escaladores e ximnastas, para dotar a cidade de Ourense das infraestruturas máis axeitadas para a práctica destas disciplinas deportivas e seguir na procura da mellora das xa existentes, tendo como eixo fundamental o fomento do deporte base nesta cidade.

#### **SENDO O SEGUINTE PUNTO DE ACORDO O DEFINITIVO:**

1. Instar ao Goberno local a que dende o Consello Municipal de Deportes se acade o consenso das forzas políticas, escoitando tamén as achegas do colectivo de escaladores e ximnastas, para dotar a cidade de Ourense das infraestruturas máis axeitadas para a práctica destas disciplinas deportivas e seguir na procura da mellora das xa existentes, tendo como eixo fundamental o fomento do deporte base nesta cidade.

#### **Emenda presentada polo Grupo Municipal do Bloque Nacionalista Galego**

#### **EMENDA DE SUBSTITUCIÓN:**

##### TEXTO INICIAL DA PROPOSTA DE ACORDO

1. Instar ao Goberno local a poñer en marcha os mecanismos administrativos necesarios para a compra e adaptación do complexo deportivo Bamio como unha nova instalación deportiva para a cidade.

##### PROPOSTA DE SUSTITUCIÓN

1. Instar o Goberno Local a elaboración dun informe técnico sobre a situación na que se atopan actualmente as instalacións do Complexo Deportivo Bamio, en tanto en canto, o informe realizado en 2018 alertaba de graves deficiencias estruturais nas instalacións que farían inviable a súa reforma, tendo que ser demolidas todas as construcións existentes no complexo.





**CONCELLO DE OURENSE**  
**SECRETARIA XERAL**

**REDACCIÓN FINAL DA PROPOSTA DE ACORDO**

1. Instar o Goberno Local a elaboración un informe técnico sobre a situación na que se atopan actualmente as instalacións do Complexo deportivo Bamio, en tanto en canto, o informe emitido en 2018 alertaba de graves deficiencias estruturais nas instalacións que farían inviable a súa reforma, tendo que ser demolidas todas as construcións existentes no complexo.

O Pleno do Concello, por dezasete votos a favor do Grupo Municipal do PSdeG-PSOE, do Grupo Municipal do Partido Popular e do Grupo Municipal do Bloque Nacionalista Galego; e sete abstencións, do Grupo Municipal de Democracia Ourensana, do Grupo Municipal de Ciudadanos e de dona María Teresa Rodríguez Garrido, don José Miguel Caride Domínguez e de don Laureano Bermejo Ansia, concelleiros non adscritos, adoptou o seguinte **ACORDO**: Aprobar a emenda do PSdeG-PSOE.

O Pleno do Concello, por dous votos a favor do Grupo Municipal do BNG; un voto en contra de don Laureano Bermejo Ansia, concelleiro non adscrito; e once abstencións do Grupo Municipal do PSdeG-PSOE, do Grupo Municipal do Partido Popular, do Grupo Municipal de Ciudadanos e de dona María Teresa Rodríguez Garrido, don José Miguel Caride Domínguez e de don Laureano Bermejo Ansia, concelleiros non adscritos, adoptou o seguinte **ACORDO**: Rexeitar a emenda do BNG.

En consecuencia, apróbase a moción coa redacción dada polas emendas do PSdeG-PSOE e do BNG.